

Il Grischun sco champ da battaglia

Ils eveniments da guerra dal temp da la helvetica (1799-1803)

■ **Suenter la Revoluziun franzosa (1789) è prorutta tranter la Frantscha e las monarchias europeicas l'Emprima Guerra da coaliziun ch'ha durà dal 1792 al 1797. Questa guerra è ida a fin cun la Pasch da Campoformio (Friul) dals 17 d'october 1797, en la quala l'Austria ha stui acceptar sia sconfitta en l'Italia dal Nord. Ils 10 d'october dal medem onn eran era las anteriuras terras subditas da la Republica da las Trais Lias s'associadas a la Republica Cisalpina ch'era s'establida en l'Italia dal Nord sco stadi associà a la Frantscha.** Lentschatta mars 1798 han truppas franzosas occupà la Veglia Confederaziun ed integrà quella sco Republica helvetica en la sfera d'influenza da la Frantscha. Sco cuntramesira èn truppas austriacas sa postadas – sin dumonda da las forzas conservativas ed aristocraticas dal Grischun – en l'entir territori da la Veglia Republica. L'enviern 1798/99 han tant la Frantscha sco l'Austria concentrà grondas forzas armadas al nord ed al sid da las Alps.

Il mars 1799 è prorutta la Segunda Guerra da coaliziun. En rom da quella han ils Franzos sut André Masséna conquistà il Grischun (tr.a. cun agid dal general franzos cun ragischs grischunas Joseph Laurent de Mont). Quai ha significà la fin da la Republica da las Trais Lias ch'è vegnida integrada sco chantun Rezia en la Republica helvetica.

Ma alura èn suandadas sconfittas dals Franzos en la Germania dal Sid e cunter la coaliziun austriac-russa en l'Italia dal Nord. Quests success cunter l'expansiun franzosa han manà en divers lieus a sullevaziuns dal pievel (tr.a. Battaglia da La Punt/Rehanau). Il general austriac Hotze ha reconquistà il Grischun e stgatschà ils Franzos fin a Turitg. Suenter l'Emprima Guerra da Turitg han ils Franzos stui rumir la citad; a medem temp han els pers il Tessin, il Vallais Sura, il Gottard e la Svizra Centrala.

L'avust 1799 èsi reussi al general Lecourbe da reconquistar il territori dal Gottard. Da vart da la coaliziun eri previs ch'il general russ Korsakov substituëschia las truppas austriacas al nord; e Hotze dueva tegnair la regiun dal Linth ed il Grischun fin che Suvorov arrivava cun novas forzas nà dal sid. Ma Masséna ha disturbà quests plans: en la Segunda Guerra da Turitg ha el batti Korsakov; e suenter in'ulteriura sconfitta ha Hotze stui sa retrair en il Vorarlberg. Suvorov, ch'era gia penetrà sur il Gottard vers la

Svizra Centrala, è la finala stà sfurzà da sa retrair sur il Veptga.


Gia a partir da l'atun 1799 han ils Franzos pudì reconquistar las valladas occidentals dal Grischun; la stad 1800 èn suandadas truppas franzosas sut general Lecourbe nà dal nord. La Cunvegna d'armistizi da Parsdorf dals 15 da fanadur 1800 ha partì l'Europa en sferas d'influenza franzosas ed austriacas, separadas da zonas neutralas. Questa tripartiziun è er s'effectuada sin il territori dal Grischun. En l'Engiadina Bassa ha la regenza proaustriaca anc pudì sa mantegnair intgins mais; ma facticamain è la Frantscha stada da la stad 1800 fin a la mediaziun da l'onn 1803 la pussanza dominante. Quai tant pli che l'Austria ha stui renconuscher ils 9 da favrer 1801 en rom da la Pasch da Lunéville – ch'ha terminà la Segunda Guerra da coaliziun – l'existenza da la Republica helvetica sut influenza franzosa.

André Masséna

* 6 da matg 1758 a Nizza, † 4 d'avrigl 1817 a Paris, catolic. Figl da Jules, commerziant da vin, e da Catherine nata Fabre. ∞ Rosalie nata Lamarre. Il 1791 è Masséna entrà sco voluntari en l'armada franzosa ed ha participà il 1795-97 sco general da divisiun a la campagna d'Italia. Il favrer 1799 ha el surpiglià il cumond da l'armada franzosa da la Helvezia, en substituziun dal general Schauenburg. Il mars 1799 ha el conquistà il Grischun ch'el ha fatg incorporar en la Republica helvetica (Joseph Laurent de Mont è stà in da ses brigadiers). Durant la Segunda Guerra da coaliziun è el vegnì battì dals Austriacs en l'Emprima Battaglia da Turitg il zercladur 1799. El ha obtegnì ina victoria decisiva cunter ils Russ dad Alexander Korsakov ils 25 da settember sequent en la Segunda Battaglia da Turitg ch'ha terminà la preschientscha da las truppas coaliadadas en Svizra (p.ex. da quellas sut il commando d'Alexander Suvorov). Marschal da l'Imperi napoleonico. Sébastien Rial

Ludwig de Caprez

* 29 d'avrigl 1727 a Trun, † prim da schaner 1808 a Trun, catolic, da Trun. Figl da Ludwig, bandierel, e da Catharina nata Lumbriser. Il 1748 è Caprez entrà en la Guardia svizra en Frantscha. Il 1752 è el daventà segund, il 1758 emprim sutlitenent, il 1760 litenent. Recepziun en l'Urden da S. Luis 1763, colonel 1769, brigadier d'infanteria 1781,



Cumbats tranter Franzos ed Austriacs a Punt Martina (mars 1799).

feldmarschal e relaschada 1788. Ils 7 da mars 1799 ha el cumandà cun success il landsturm sursilvan cunter il general franzos Louis Henri Loison ch'era avanzà sur il Cuolm d'Ursera. Questa victoria aveva stgaffi las premissas per la capitulaziun avantagiusa davant il general Joseph Laurent de Mont a Tavanasa. Quella aveva retegnì Caprez da participar a l'assagl sventiraivel dals Sursilvans a La Punt/Rehanau a l'entschatta da matg 1799. Caprez è mort senza descendenza. Ursus Brunold

Joseph Laurent de Mont [Demont]

* 28 da settember 1747 a Sartrouville (Ile-de-France), † 8 da matg 1826 a Paris, santeri da Père Lachaise, catolic, da Vella. Figl da Joseph Marie, uffizier, e da Marie Elisabeth nata Imhof. Nubil. Scolas claustrals da Faveras (1756-60) e Mustér (1760-63). Schuldà a partir dal 1764, sutlitenent en il regiment svizzer Waldner en servetsch dal retg da la Frantscha 1768 ed aide-major en il regiment Vigier 1782. Carriera militar en l'armada revoluziunara franzosa suenter il 1792. Il 1799 ha el participà a l'invasiun en il Grischun sco general da brigada da l'armada franzosa da la Helvezia. Suenter la Battaglia d'Austerlitz (blessà) è el vegnì nominà general da divisiun il 1805, senatur il 1806 e comte d'Empire il 1808. Mont è s'opponi pli e pli fitg a Napoleun ed il 1814 al ha Louis XVIII numnà pair de France; da questa Chombra è el stà deputà fin il 1826. Mont ha obtegnì numerusas ensainas e distincziuns. Ses num è engravà en l'Arc de Triomphe a Paris. Mont è l'erox dal roman «General Demont» (1906) da Maurus Carnot (rumantsch 1939) e dal drama omonim da Toni Halter (1963). Ursus Brunold

Anna Maria Bühler

* 4 d'avust 1774 (Onna Maria Bieller) a Domat, † 25 da november 1854 a Cuir, catolica, da Domat. Figlia da Blasius Bieller, pur, e da Maria Ursula nata Ruodulf. ∞ 1) 1803 Joseph Jäger, da Vetten, 2) Heinrich Brandenstein, da Rothenburg (Hessen). En la battaglia tranter la reserva sursilvana e las truppas franzosas duai Bühler avair commess ils 3 da matg 1799 a Domat in act eroic, essend «den Pferden in die Zügel gefallen [ed avend] die Canone dadurch aufgehalten und ihre Eroberung durch die Landleute bewirkt». Quest eveniment vegn menziunà per l'emprima giada en la «Churer

Zeitung» dals 2 d'avust 1799 e confermà uffizialmain da las autoritads communalas ils 8 da favrer 1804. A partir dal 1804 ha l'uschenumnada Kanonenmaid lavurà sco fantschella en la chasa dal cont Johann von Salis-Soglio a Cuir. Il 1812 ha ella gi in'audiencia persunala tar l'imperatur Franz I a Vienna e retschavì da quest ina remuneraziun ed ina pensiun per vita duranta. Dapi la Festa federala da tir dal 1842 a Cuir chatta l'act eroic accoglientscha en la letteratura patriotica ed en la publicistica nazionala. Adolf Collenberg

Alexander Suvorov

* 24 da november 1729 u il 1730 a Moscava, † 18 da matg 1800 sper Asow (Russia). General russ, dal 1799 marschal e generalissimus. En la Segunda Guerra da coaliziun sur il Engalterra, Austria e Russia cunter la Frantscha ha Suvorov stgatschà la stad 1799 cun sia armada russa las truppas franzosas da la Lombardia. Alura avess el duì far frunt en la regiun da Turitg, cun agid da l'armada dal general Korsakov, a las truppas franzosas da la Helvezia, cumandadas dal general André Masséna. Suvorov vuleva attatgar l'armada da Masséna da davos, avanzond cun sia schuldada (ca. 21 000 umens) sur il Gottard, il Lucmagn ed il Cuolm d'Ursera (divisiun da Rosenberg) e tras la Svizra Interna. Ils 24 da settember 1799, suenter cumbats cunter ils Franzos sper Faido ed Airolo, ha el cuntanschì cun sia truppa il Pass dal Gottard e trais dis pli tard – suenter dirs cumbats en la Scalinna cunter il general franzos Claude-Jacques Lecourbe – Altdorf en il chantun Uri. Ils 25 e 26 da settember ha Korsakov pers la segunda battaglia sper Turitg, uschia ch'il plan strategic da reunir las duas armadas russas ha fatg naufragi. L'armada da Suvorov ha stui guntgir sur il Pass dal Kinzig en la Val Muota ed alura sur il Pass dal Prigel en il Glaruna e marschar ils 6 e 7 d'october – cunquai ch'il general austriac allià, Johann Konrad Hotz, era medemamain vegnì battì sper Schänis – sur il Veptga, cuvert cun naiv, en Surselva. Ils 12 d'october ha el bandunà cun sias truppas il Grischun sur il Pass S. Glienzi ed è turnà sur Minca en Russia. La campagna da Suvorov en las Alps, accumpagnada da malauras, navaglias e cumbats, ha chaschunà grondas perditas. L'istoriografia svizra e la legenda da Suvorov accentueschan oravunt tut la

prestaziun militar da Suvorov e revieschan a la miseria da la populaziun pertutgada da la campagna. Lung la ruta da passagi existan numerus monuments e tavlas che regordan a Suvorov, per exempel a Pigniu al pe dal Veptga. Eduard Muoth ha scrit il drama istoric «Suworoff» (cun part musicala da Duri Sialm; represchentà a Breil il 1921).

Adolf Collenberg

Deportads (1799-1801)

Suenter l'occupaziun temporara dal Grischun tras truppas franzosas l'avrigl 1799, ha il general André Masséna laschà arrestar exponents e partisans (per part presuntivs) da l'Austria. Il matg 1799 èsi reussi als Austriacs da rebatter l'armada franzosa e d'arrestar aderents da la Frantscha. Pir sis mais pli tard ha la Regenza a Vienna communitgà als deportads «franzos» ch'ella considereschia els sco subjects da pegn e che lur liberaziun dependia da la relaschada dals deportads «austriacs» tegnid en fermanza a Salins (Franche-Comté). Sin intervenziun dal Cussegl prefectural provisoric, installà dal chantun Rezia ils 16 da fanadur 1800, ha il general Jean-Victor Moreau laschà translocar ils deportads «austriacs» da Salins a Son Gagl per accelerar la liberaziun dals ostagis «franzos» a Puntina. Suenter che la Regenza interimala «austriaca» era fugida a Zernez ils 30 da fanadur 1800 respectivamain a Bulsau il 5 da settember 1800, ha l'Austria retegnì ils deportads «franzos» per garantir il return dals exponents da la Regenza interimala en il Grischun. Malgrà ch'il Cussegl prefectural aveva declerà l'amnestia politica generala e pretendì da la Regenza interimala, ch'era sa patronada da la cassa publica, da render quint mo davart il diever da quels daners, han ils regents pertutgads preferì da restar sut la protecciun directa da l'Austria ch'ha alura retegnì ils deportads vinavant sco ostagis. Adolf Collenberg

Étienne Jacques Joseph Alexandre Macdonald

* 17 da november 1765 a Sedan (Ardenne), † 25 da settember 1840 a Courcelles (Centre/F). Oriund d'ina famiglia da giacubits scots. General franzos 1793, divisiunari 1796, guvernatur da Roma 1798. A l'entschatta dal 1799 ha Macdonald conquistà Napel, ma il zercladur 1799 ha el subì ina sconfitta cunter Alexander Suvorov a Trebbia (Emilia-Romagna). L'entschatta da december 1800 è Macdonald vegnì en in stemprà da naiv cun translocar sias truppas d'artigliaria (ca. 12 000 umens) sur il Pass dal Spleia a Clavenna; el ha pers passa 100 schuldads cun chavals e material ed ha subì sez fermas schelentadas. Suenter campagnas militaras victoriosas en l'Austria è Macdonald vegnì numnà da Napoleun a Wagram marschal da la Frantscha (fanadur 1809) e duca da Trento (december 1809). Il 1812 è Macdonald stà cumandant en Catalogna ed en Russia (Riga), l'avust 1813 è el vegnì battì dal marschal Gebhard Leberecht von Blücher a Katzbach (Liegnitz/Prussia, oz Legnica/Pologna). Il 1815 è el s'allià cun ils Burbons. Max Hilfiker

Lexicon Istoric Retic

Il LIR cumpiglia bundant 3100 artigels (geografics, tematics, artigels da familias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.



Suenter il sullevament dal matg 1799 han ils Franzos dà feu al vitg da Mustér.